

ARLEF: IL FURLAN AL SVOLE CU LIS PAVEIS DI BORDAN

Sotscrit un protocol fra la Agenzie, il Comun e la cooperative par ativâ azions di disvilup finalizadis a favorî l'ûs de lenghe furlane inte divulgazion scientifiche e naturalistiche, inte didatiche e intal turisim sostignibil.

La **ARLeF** - Agenzie Regjonâl pe lenghe furlane, il **Comun di Bordan** e la **Cjase des Paveis** a stimin che l'ûs de lenghe furlane intal setôr de divulgazion scientifiche e naturalistiche, de didatiche e dal turisim ecosostignibil a rapresentin un strument prezios e une oportunitât par valorizâ il teritori, la sô biodiversitât (ancje linguistiche) e la ricjece culturâl, fasint ancje di volan tant che element distintif pal marketing teritoriâl e pe fidelizazion de utence.

E je cheste la convinzion che e sta ae base dal **protocol specific di intese** sotscrit di Lorenzo Fabbro (president de ARLeF), Gianluigi Colomba (Sindic di Bordan) e Stefano Dal Secco (president de cooperative "Farfalle nella testa" che e gjestis la struture).

*«La ARLeF, tant che organisim competent ae definizion des direzions di politiche linguistiche – al sclaris il **president Fabbro** – e cjate significative la colaborazion cu la Cjase des Paveis (la plui grande intal so gjenar in Italie) stant che e rapresente une realtât ecomuseâl tra chês plui impuartantis a nivel internazionâl; une struture perfete par valorizâ, disvilupâ e divulgâ la lenghe furlane in lûcs di grande frequentazion turistiche e formative».*

*«Il Comun – al zonte il **sindic Colomba** – che al metarà a disposizion il personâl dal propri Sportel intercomunâl pe lenghe furlane pe ativitât di traduzion e pal supuart aes iniziativis previodudis intal ambit dal protocol, al è une vore favorevul a cheste iniziative e al rimarche la buine sinergjie che si è creade tra i diviers protagoniscj de sotscrizion. Jessint al centri di une aree tant furlanofone, o sin convints che l'ûs de marilenghe al contribuissi in maniere significative al slargjâsi de cognossince dal sît turistic plui impuartant dal Comun di Bordan».*

La cooperative "Farfalle nella testa", di bande sô e su domande, e à za prontât percors di visite vuideade ae struture tignûts in lenghe furlane, proponint ancje **pachets didatics specifics par furlan indreçâts aes scuelis dal teritori**, che a àn par ogjet la origjin e il mont des paveis, la vite

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

des paveis (spiegade cuntun teatri di figuris) e la nature dal lâf di Cjavaç, il bacin di aghe naturâl plui grant dal Friûl. Cun di plui, in osservance dal protocol, la strutture di gjection si impegne a fâ **segnaletiche e cartelonistiche plurilengâl** – include la lenghe furlane – interne e esterne ae strutture museâl; meti la **lenghe furlane intal sît internet, intal materiâl promoziônâl e in dute la comunicazion uficiâl dai avigniments tematics**; doprâ fra lis variis lenghis ancje il furlan intai tescj descrittîfs e di supuart des mostris temporaniis; furnî articui di divulgazion scientifiche che a saran doprâts de ARLeF pai propriis fins istituzionâi e divulgatîfs.

Di bande sô, la Agenzie Regjonâl pe Lenghe Furlane e coordinarà lis variis azions previodudis dal protocol e e ufrirà la proprie consulence scientifiche e linguistiche ai varis atôrs dal proget.

Cjase des Paveis

Chê di Bordan e je la plui grande Cjase des Paveis di Italie. E je componude di 3 grandis sidreris climatizadis (par un totâl di 1.000 m² cuvierts), là che a prosperin animâi e plantis di 3 ecosistemis tropicâi specifics: la Amazonie, i boscs pluviâi asiatics e la jungle africane. In ogni sidrere a svolin libaris un miâr di paveis di centenârs di speciis diviersis e che a vegnin dai Paîs tropicâi di dut il nestri planet. La strutture e je vierte al public dal prin di Març ai 31 di Otubar.

Udin, ai 19 di Setembar dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<